

Zeitschrift: Igl Ischi : organ della Romania (Societat de Students Romontschs)

Herausgeber: Romania (Societat de Students Romontschs)

Band: 14 (1912)

Nachruf: Dr. Domeni Willi uestg de Limburg

Autor: Willi, Domeni

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 30.07.2025

ETH-Bibliothek Zürich, E-Periodica, <https://www.e-periodica.ch>



† Dr. Domeni Willi uestg de Limburg.

Era en las raras retschas della Romania fa la mort sia raccolta e damonda dad ella beinduras grevas unfrendas. Dein nus puspei anavos ina quorta egliada sin igl onn passau, stovein nus cun dolur constatar, ch' era el hagi caschunau a nus grevas sperditas. In sentiment de pietat ed engraziament pretenda da nus, che nus seregordeien da quels, ils quals ein stai en veta nos amitgs e benefacturs e denter quels dumbrein nus nies Dr. Domeni Willi, uestg de Limburg, il qual ei spartius da questa veta ils 6 de Schaner 1913.

Dr. Domeni Willi, uestg de Limburg, ha giu sia tgina sin quei ferm rempar, che nies lungatg romontsch posseda enviers il gigant tudestg. A *Domat*, che ha regalau alla baselgia buca meins che 4 uestgs, 2 avats ed ina entira retscha conventuals e spirituals, ei era uestg Dr. Willi naschius ils 20 d' Avrel 1844. Carl Martin fuva siu num de batten. Siu bab, L. Willi, ha surviu duront plirs onns en survetsch militar a Napel, nua ch' el ha aquistau il grad de capitani. El ei morts pér igl onn

1889 en aulta vegliadetgna, duront che sia consorta Elisabet Biehler, mumma de Carl Martin, ruassava gia dapi entgins onns sin senteri. Schi bein il bab sco la mumma possedevan in profund sentiment religius e menavan ina veta veramein cristiana. Specialmein la mumma, la quala fuva muort sia buontat e benevulentscha stimada e carezada da giuven e vegl, ha influenzau sin ina tut speciala moda ses dus affons, ina feglia, ch' ei pli tard morta sco giuvna consorta, ed il pign Carl Martin. El fuva principalmein la poppa digl égl della mumma e dad ella ha el artau sia buontat e benevulentscha. Dalla mumma ha el udiu ils emprems suns en viarva romontscha, per la quala el ha pli tard era sin tratsch german adina demussau affecziun ed interess. Ses emprems onns ha el visitau la scola primara romontscha de siu vitg patern. Prest han mussaders e geniturs catau adagur il grond talent, il qual schischeva zuppaus en il pign mattatsch. Ils geniturs ein sedecidi de termetter il buob a scola. Cun 10 onns ha el bandunau ses cars geniturs ed ei serendius a Cuera tier parents. Cheu ha el frequen-tau duront in onn la scola primara sin il Hof. Gia en la zarta vegliadetgna de mo 11 onns eis el luigl onn 1855 entraus en il gimnasi della venerabla claustra a Nossadunnaun, nua che capavels instruc-ters han cultivau tier el spért e cor sin la mede-ma moda. Denter ses mussaders sesanflavan denter auter in P. Benno Kühne, in P. Heinrich de Ricken-

bach ed in P. Martin Marty de Sviz, il qual ei pli tard daventaus missionari ed uestg de s. Cloud ell' America septentrionala, nua ch' el ei morts igl onn 1896.

Havend absolviu cun bien success ils studis gimnasials, ei il talentus giuven Carl Martin sedecidius de dedicar sias forzas al survetsch dil Segner. Igl onn 1861, en ina vegliadetgna de mo 17 onns, eis el entraus en la claustra de Cisterciens a Mehrerau sper Briganzia, nua ch' el ha ils 13 de November 1862 prestau il serrament ed obtenu il num Domeni. Ils onns sequents, dals quals P. Domeni ha danovamein passentau dus (1863—1865) a Nossadunnaun, fuvan dedicai al studi della filosofia e della theologia. Ils 12 de Matg 1867 ha igl uestg Amberg a S. Pieder dau al talentus giuven las benedicziuns sacerdotalas ed aunc il medem onn eis el dagl avat Reimann vegnius numnaus prefect dil collegi St. Bernardi a Mehrerau, in clar mussament, che P. Domeni Willi gudeva gronda stema tier ses superiurs. In vast camp fuva cheutras aviarts ad el. Beingleiti ha ei semussau, ch' il giuven prefect fuva tuttavia vengonz de quella honur.

El era buca mo ornaus cun rehas enconuschientschas, na el possedeva era la habilitat ded instruir ed educar ses scolars en ina maniera veramein meisterila. El capeva de gudignar il cor e la confidanza de scolars e geniturs ensemblamein ed aunc pli tard han els salvau quella confidanza

ed en difficultusas questiuns priu tier el cussegl. En renconuschientscha de ses gronds merets per la scola ha igl avat numnau el rector digl institut, pia directur dil gimnasi. En qualitat sco rector fuva ei ad el tgiunschamein pusseivel ded organisar la scola tenor siu giavisch ed alzar ella cheutras adina pli e pli.

Igl onn 1878, suenter la mort digl avat Martin Reimann, ei il prior P. Maurus Kalkum vegnius elegius avat della claustra de Mehrerau e per siu successur ha el numnau il rector P. Domeni. Aschia fuvan dus dils pli impurtonts uffecis, che la claustra haveva de distribuir mess en mauns de P. Domeni Willi.

Diesch onns de stenta e lavur ein vargai. Il combat culturian haveva ussa furiau ora, las persecuziuns enviers la baselgia catolica e tut quei che senumnava catolic havevan cediu e la baselgia sezza fuva en quei terribel combat, il qual ha era caschunau ad ella grevas sperditas, sepurificada e serinforzada. In temps de nova flurizun dueva puspei entscheiver, specialmein en Tiaratudestga. Pli ras claustras havevan gia all' entschatta dil 19 avel tschentaner stoviu su ttacumber el combat. La medema sort haveva era tuccau la claustra de Cisterciens a *Marienstatt* en Hessen-Nassau (dapi 1867 ina provinzia della Prussia). La claustra Marienstatt ei vegnida fundada igl onn 1215. Suenter haver existiu bunamein sis tschentaners eis ella vegnida

sligiada si igl onn 1803, mo buca per adina, 85 onns pli tard dueva ella puspei levar si tier nova veta. Ei fuva igl onn 1888, cura ch' igl avat Maurus Kalkum de Mehrerau ha termess P. Domeni



† Uestg Dr. Domeni Willi.

Willi cun aunc tschun auters conventuals e treis frars laics a Marienstatt cun la missiun de puspei destadar la venerabla claustra. P. Domeni fuva il menader della nova familia e haveva igl uffeci de

prior ed administrator della claustra a Marienstatt. Per igl institut S. Bernardi a Mehrerau era la parteniza de siu rector ina gronda sperdita. Schi bein per ses confrars sco per ses scolars ei il comiau staus grevs. Mo era agl erudit mussader e rector ha ei segir custau enqual' larma, essend ch' el carezava ses frars e ses scolars, sco in bab carezescha ses affons. Era enconuscheva el fetg bein las grondas difficultats, che sia nova missiun vegneva a portar ad el.

En in vast baghetg, bandunau ed isolau, che haveva pli gronda semegliadetgna cun ina ruina, che cun in' undreivla habitaziun — lunsch naven da ses cars — duev' el prender siu albier e fundar ina nova scola. En verdat ina greva missiun! Mo P. Domeni fuva buca igl um, che schava stermenatar aschi spert. En buca ditg ha el giu gudignau l' affecziun dil pievel, per il qual el ei prest daventaus in premurau bab spiritual. — Nova veta flu-reva sin las ruinas. Igl ei buca de sesmerveglier, sch' igl uestg Dr. Klein a Limburg ha gia suenter in onn tschentau tier igl avat della claustra ma-terna a Mehrerau, il qual haveva il dretg de numnar igl emprem avat, la supplica de vuler eleger il capavel P. prior Domeni Willi avat della claustra a Marienstatt. La supplica ei bugen vegnida exau-dida, ed ils 8 de Schaner 1890 ei l' elecziun ve-gnida confirmada da Sia Sontgadat Papa Leo XIII. Igl Avrel dil medem onn ei il niev avat returnaus

tier ses confrars a Mehrerau, per retscheiver leu en la baselgia della claustra la benedicziun d' avat. Cun tgei legria vegnan ses confrars ed anteriurs scolars a haver retschiert il tscherniu dil Segner! In ferm ligiom uneva ussa las duas abbazias ina cun l' altra. Aunc steva avat Domeni Willi mo en siu 46 avel onn, sia ferma constituziun corporala e spirtala, artada da nos vegls grischuns, haveva resistiu vigurusamein.

Suenter esser benedius ora avat ils 27 d'Avrel 1890, eis el beingleiti puspei returnaus en sia nova patria a Marienstatt, nua ch' el ei ils 8 de Matg vegnius installaus tenor usit della baselgia. En buca ditg saveva la claustra de Marienstatt selegrar ded esser daventada tras meret dil stimau e carezau avat il centrum per ils spirituals digl entir contuorn, appartenent als uestgius de Limburg, Trier, Köln e Paderborn. Era il diember dils scolars della claustra carscheva onn per onn. —

Avat Domeni Willi enconuscheva era la historia de siu uorden sco negin auter. El ha dapi 1879 scret in grond diember lavurs, en las qualas el trac tescha specialmein la claustra de Cisterciens a Wettingen sper Baden (Aargau), ch' ei 1841 vegnida sligliada si e 1854 puspei sereconstituida a Mehre rau sper Briganzia, nua che nies Carl Martin Willi ha siat onns pli tard priu siu habit. Speciala breigia ha avat Willi sedau de rimnar documents sur

la historia de siu uorden. Buca meins che 6 gronds ed entgins pli pigns volumns ein empleni cun tals documents. Willi ha cheutras segirau a sesez in num en la historia.

La divina Providentscha haveva denton destinau el per ina aunc pli aulta e greva dignitat. Ei fuva ils 6 de Fevrer 1898, cura ch' il sura numnau Dr. Klein, uestg de Limburg, ei morts. Per siu successur ha lu ils 15 de Zercladur 1898 il capetel catedral de Limburg elegiu unanimamein igl avat Domeni Willi de Marienstatt. Tut tgi ch' enconuscheva il niev uestg, «igl um cun in cor ded aur,» sco pliras gassetas han repetidamein numnau el, ha selegrau de quella elecziun. Aschi grev sco éi mava al niev tscherniu de bandunar sia cella e serender en il palast episcopal, ha el tonaton acceptau la nomina, perschuadius ch' ei seigi quei la veglia de Diu. Ils 8 de Settember dil medem onn ha el retschiert tras igl uestg Dr. Haffner de Mainz en la catedrala a Limburg las benedicziuns per siu niev uffeci.

Quort suenter anflein nus uestg Willi sin viadi atras sia diocesa, spendend il s. sacrament della creisma. El capeva tras sia migeivladat e ses plaids com-muentonts de gudignar il cor de ses diocesans e ded entusiasmar els per il bi ed il bien. Grondá attenziun ha el schenghiau alla cultivazion dil clerlus. Essend ch' il vegl seminari porscheva buca in spazi sufficient, ha el schau ereger 1905 in niev convict, il qual el ha numnau St. Bernardi, sco quel

della claustra a Mehrerau. Cheutras ha el obteniu plaz per varga 200 alumns, dals quals la pli part dueva pli tard daventar spirituals. Tschun onns suenter ha el eregiu in secund convict, il collegium «Marianum». In grond diember ded uordens e congregaziuns han duront igl episcopat de Mgr. Willi anflau in asil en sia diocesa. Gronds merets ha el aquistau tras ereger numerusas pleivs novas. Buca meins che 30 baselgias, tier las qualas el ha era sez contribuiu grondas summas, ein vegnidas consecradas entras el.

Quindisch onns quasi ha Mgr. Willi regiu la diocesa de Limburg. Ed en verdat, el ha teniu la empermischun, ch' el ha fatg, cura ch' el ha montau la sedia episcopala, ded esser viers in e scadin in bien e migeivel bab. Siu niebel cor savevan tuts quels admirar, ils quals havevan caschun ded observer, cura ch' el conversava sin sias promenadas cun ils affons e cura ch' el plidava en siu casti cun il pauper rugadur, il qual plirava sur da sia pupira.

Dasperas anflava el aunc adina temps de continuar ses studis sur la historia de siu uorden, in factum che muossa eclatantamein, tgei forza e tschaffen de luvrar el ha conservau entochen sia fin.

En la claustra a Seisingen, in vitg en la Prus-sia renana, nua ch' el era serendius igl atun var-gau per prender part dils exercezis, eis el vegnius suprius dad ina fleivlezia dil cor, dalla quala el dueva buca serestabilir pli; ils 6 de Schaner 1913

ha il Signur sur veta e mort priu si siu fideivel survient tier el. 5 uestgs, varga 400 spirituals ed in grond diember de delegaziuns digl imperatur e dellas differentas autoritats han compignau sia bara tier la fossa. Igl ei quei in clar mussament, tgei stema e popularitat uestg Dr. Domeni Willi gudeva buca mo en sia diocesa, mobein aunc lunsch sur ils confins de quell' ora. Cun el ei in de nos megliers compatriots jus en fossa.

Schege ch' el ha luvrau ed uregiau sin sulom german, ha el tonaton buca emblidau sia viarva materna. Adina eis el sedumbraus denter ils lecturs della «Gasetta Romontscha» e digl «Ischi». Tgei viv interess uestg Willi ha repetidamein documentau per il manteniment de nies lungatg romontsch semuossa bein il meglier ord ina brev, che el ha scret sut ils 12 de Settember 1902 alla redacziun digl Ischi. En quella di el denter auter: «Cun grond plischer hai jeu avon plirs onns udiu tras la «Gasetta Romontscha» la fundaziun della Romania, la quala ha l'intenziun de mantener il lungatg matern; ed era suenter cun buca pign interess legiu ils referats sur las redunonzas annualas della Societat. Jeu beneventeschel il bein motivau program e giavischel da cor alla Societat in prosperiu progress. Cun pintga breigia e grond success emprendan ils Grischuns ils lungatgs jasters. Possien els cun la medema fervur era retener, cultivar e promover il lungatg, il qual els han empriu da

lur mummas ed il qual els han duvrau per exprimer ils emprems plaids de lur veta. Cun plischer acceptel jeu il tetel de commember honorari della Romania.» (Ischi, VI annada, p. 8.)

Cun quella brev ha Mgr. Willi aunc uniu in bi regal per mauns della Romania, in regal ded in generus padrin a sia figliola sin il di de batten. Mo sco il bien padrin seregorda beinduras de sia figliola, aschia eis er' el seregordaus della Romania. Igl abonnement per igl «Ischi» pagava el mintgammal cun in marenghin. La mumma Romontscha stat cun la Romania sper sia fossa plonschend de haver piars in de ses pli premurai e fideivels fegls.

. . . R. I. P. . . .



A. SPESCHA, scolast real.